

# Sasaran dua universiti awam terbaik dunia mampu dicapai

**Kuala Lumpur:** Kementerian Pendidikan Tinggi (KPT) kini di landasan betul dalam mencapai sasaran memastikan sekurang-kurang dua universiti awam dari Malaysia tersenarai sebagai 100 universiti terbaik dunia, menjelang tahun 2020.

Menterinya, Datuk Seri Idris Jusoh (**gambar**), berkata beliau gembira kerana pengumuman terbaru dibuat World University Rankings (QS) menunjukkan secara keseluruhan ke-dudukan semua universiti di Malaysia adalah semakin baik setiap tahun.

Malah, katanya, tiga institusi pengajian tinggi iaitu Universiti Malaya (UM), Universiti Sains Malaysia menunjukkan peningkatan memberangsangkan untuk tiga tahun berturut, sejak tahun 2013.

“Kita berasa suka-cita kerana pengumuman terbaru dibuat QS menunjukkan kebanyakannya universiti kita memperlihat peningkatan berterusan, terutama UM yang meningkat dari kedudukan ke-167 pada tahun 2013 kepada 151 (2014) dan seterusnya di tempat ke-146 terbaik dunia, tahun ini.

## Bangga pencapaian UM

“Saya amat bangga dengan pencapaian UM kerana ini kali pertama kita berjaya berada di kelompok 150 universiti terbaik dunia.

“Selain itu, USM juga meningkat dari kedudukan ke-355 (2013), ke-309 (2014) dan ke-289 (2015), manakala UPM pula meningkat dari kedudukan ke-411 (2013), ke-370 (2014) dan tempat ke-331 terbaik dunia pada tahun ini,” katanya pada sidang media selepas melancarkan Kumpulan Pendidikan Ilmu (ILMU) yang diterajui syarikat pengurusan dana ekuiti persendirian berkaitan kerajaan, Ekuiti Nasional Bhd (Ekuinas), di sini, semalam.

Mengulas lanjut, Idris berkata, sasaran itu mampu direalisasikan dengan pelaksanaan Pelan Pembangunan Pendidikan Malaysia 2015-2025.

## UKM perlu bertanggungjawab

Mengenai kejadian seorang pelajar Universiti Kebangsaan Malaysia (UKM) yang dikatakan ditikam kerana perselisihan fa-ham berhubung pemilihan pemimpin pelajar, Idris berkata, kejadian itu adalah terpencil dan sedang diuruskan oleh pihak pengurusan universiti berkenaan.

“Pihak pengurusan UKM perlu bertanggungjawab dan menjalankan siasatan terperinci punca sebenar kejadian itu kerana kementerian sudah memberi mereka kuasa autonomi.

“Justeru, semua perkara yang berlaku di UKM perlu diselesaikan oleh Naib Canselor sendiri tanpa campur tangan kementerian,” katanya.

